

Kerwered 1953

des älteren Jahrganges bei Gasthaus Weber Niedermohr.

-----

Kä schöneres Fest geb's in de Palz,  
als wie die Kerb, die heit er Einzug halt.  
Die Palz war immer noch die Perl vum Rhein,  
ä Gott gesegnet Stück'che Land;  
Mähr wolle hoffe, dass das a so bleibt,  
dass ewig hie gepappelt werd echt pälzerisch  
beim gure Tröp'che Pälzerwein.

Die Musik spelt jetzt dass es weithin schallt:  
"Solang nach ä Pälzer lebt, werd Kerb gehall !"  
Musik.

Jetzt will ich eich a all begriesse,  
ob ner vun Närremoor sinn,  
Buxtehute orer Miesäe,  
ob ner scheen sin orer wischt,  
ob ner grad sin orer krumm  
ob gross orer klein  
ob dick orer dinn,  
all hess ich eich uffs herzlichste willkumm  
als liewe Kerwegäst,  
die ehr gewillt sin unser Fest zu verschönere  
un die Musik spelt unsere liebe Gäst als Einzugsmarsch:  
Wie schmeckt so gut die kostenlose Kerwewurst!

Musik !

Es liewe Leit im letzte Jahr is hie im Dorf  
so allerhand passert,  
das eine is zum lache, üwers annere keimt mehr heile,  
awer do dran wolle mehr uns net verweile,  
denn ich misst mich jo im Herze ~~kränne~~ schäme,  
wenn sich die Buwe dahinne gere kräme,  
wann ich ne ~~stik~~ so e paar Sache vorneweg det nemme,  
dann kämt eich jo do hinne die Red als Echo vor,  
un die Buwe wäre dann über die ganze Kerb net froh.  
Un die Musik spelt denne hiesige Sündenböck mit Hose orer Rück :  
"Es geht nix über e sauberi Kerwered!"

Musik!

Doch ebes is no zu erwähne  
un zwar die Gemeinderatswahl, ach du Schöne!  
Wochenlang hat mer sich angestrengt  
Manche han Nächtelang dozu noch net geschlof,  
un hinne no stellt sichs eraus,  
die Lag gewechselt, die Herrschaft aus,  
de enne rinn, de anner raus,  
un hinner her, gehts weirer wie es war,  
es werd gescholl, es werd gemerkert hinnerum,  
mer nennt grad die Mensche wäre dumm.

Doch recht zu mache alle Leit,  
dass is e Sach die niemand kann,  
drumm nemmt es a net tragisch uff  
un die Musik macht jetzt enner druff  
und spelt eich froh un ffei:

"Nach jedem Regen, folgt auch wieder Sonnenschein!"

Musik !

Noch net so lang isses her,  
hat h grössere Wahl, die Gemüter bewegt.  
Veel Plakate ware angeschlah,  
das liebe Geld hat gar kee Roll gespelt,  
met Auto, un met Radio hat jede Partei ehr bestens geb,  
un jede hat die anner verschrieh,  
nor damet se soll me Stimme grien.  
Jede hot versproch, was se kann vielleicht net halle,  
un wenn meer Glick hann, duts so schnell a noch net knalle,  
denn meer wolle unser Lewe noch geniesse  
un net so früh de Himmel griesse.  
Soldate hann mehr jo genug im Land,  
doch dass se all deutsch gere pabbele, wär zu veel verlangt.  
Es geht bei uns bald zu als wie in em Bienehaus,  
der emne rinn, die andere fliegen aus.

Die Musik jetzt den Trauermarsch spielt:  
"Zum Finanzamt nach wie vor unser Geld hin fliesst!"

Musik! *von mer aus himmel er spile,  
für Roll hup spilt se hat so viel Geld!*

Jedem isses doch bekannt,  
dass vum Soldat Gehorsam werd verlangt,  
un weil er ausgeführt hat den Befehl,  
hat mer manchem e Prosez gedreht,  
un viele hat meer a verknakkst,  
weil se die ~~Wafi~~ Uniform gedrah,  
un ausgeführt han jeder Befehl,  
weil's im Fahneeid so steht.  
Doch das Unrecht dass geht wäirer uff de Welt,  
als wie e Uhr,  
de ~~Stärke~~ lost dem Schwache gar ke Ruh,  
bis dass uns alle falle die Auge zu.

Un werer werd davon gebappelt  
von ~~ix~~ de Armee die soll ersteh'  
zur Sicherheit fürs Vaterland,  
aus sem jungen deutschen Männerbestand.  
Die Uniform wär scheen und gut,  
un die Erziehung gar net zu verachte,  
~~och~~ was manchmol hinnerher kommt is net gut,  
denn das kennt em Kopp und Krah noch koschte.

Er Leit do gewe doch mol ehrlich zu,  
steht uns net besser de Civilhut ?  
Wann mehr in die Wirtschaft gehn kann enner schwenke,  
wann mehr tu un losse kann was mehr will,  
un wenn deheim die Alte orer die Alt a mol krakele,  
awer do is mehr immer noch ~~ix~~ de Mann im Haus,  
beim Barass is das alles aus,  
do derf mer nix mä denke,  
dort griecht mer alles je gesaht,  
Morjens wecke, Kaffee-trönke

de Anschliess beim Appel,  
dann die Erdbesichtigungsübung in jeder Lag',  
Mittagessen, die Krumbeere werre noch selbst gepellt,  
un so geht es weirer immerfort,  
wer net parrett griecht Ausgangssperr,  
muss Sunntags Brandwach schiewe  
un so geht es fort ehr Leit, ehr Liewe.

Noch net so lang, do hot mehr de Soldat verpönt und schikaniert,  
jetzt lewe meer in emner Umstellungszeit  
im nächste Jahr do isses vielleicht a schon so weit,  
dass mehr Wach kenne schiewe am Kasernentor.

Un die Musik spelt jetzt scheen und brav !

"Wanns mehr no geht, spel ich kä Soldat"!

*aber wann ich unte, dann kann ich a nick dra mache.*  
Musik !

Uff de ganze Welt do tuts doch boore,  
ob in Korea, Triest, Palestina orer Pole,  
det doch nor emal die ganz Politig de Deibel hole.  
Mehr wolle doch sunst nix, wie schaffe, lewe, esse, trinke,  
frei bleiwe un ab un zu e Schöbsche trinke.

Uff de Welt wärs doch so scheen,  
wenn se all sich enisch ~~wären~~ wärn,  
wenn'se all gern pälzerisch sproche,  
pälzerisch denke, pälzisch fñehle,  
un met Pälzer Witz un Humor,  
beim Pälzer Wein un Bier  
hinnerm Biertisch im Tubaksqualm  
ehr Debatee deren beschliesse und begiesse.

Un die Musik spelt jehzt froh un frei:

"Das schönste Land der Welt, dass is die Palz am Rhein!"

Musik!

Für desjohr werd met de Red jetzt schluss gemacht,  
damet die Kerb beginne kann,  
dass jeder zu seim Rechte kummt,  
so wolle mehr halt de Strauss mit echtem Pälzerwein begiesse  
un alles was do unne steht und lebt,  
stimmt mit ein in de Rug:

Die Närrermoorer Kerb sie lewe

hoch - hoch - hoch !

Un die Alte, die gemacht hann diesen Strauß,  
halle sich beim Otto die 3 erste Halbe un 2 Brotwärscht aus  
un die Musik spelt zu gurer Ledscht:

"Dassjohr gebts e richtiges Pälzer Kerwefest !

Musik !

